

Langnok yimtsüing nung Hok-Ah benjung mungogo



Langnok yimtsüing nung Hok - Ah benjung amungba mapang Minister of Housing & Mechanical Engineering, P. Bashangmongba Chang den tanga ketdangsürtem tangokba noksa nung angur.

Dimapur, Aenjeti/January 18 (TYO): January 17 nü Noklak district kübok Langnok yimtsüing nung Hok-Ah benjung amungba mapang Minister of Housing & Mechanical Engineering, P. Bashangmongba Chang alakteta jaoker liasü.

Iba benjung ya Nokhu Range Public Organization (NRPO)-i ayongzüka 'Progressive Society' omen nung ajemdaker mungogo.

Sentong nung o jembiba mapang Bashangmongba Chang-i, benjung salem lemsatep aser nüburtem yimjung aser tesunep nung longjemer toktsüba atema NRPO nem tenüngsang agütsüba den putu aika aotsü asoshi parnok ya milen amer kaka asütsü ajungshia liasü.

Noklak ya joko district ka kümogo, ta shia Chang-i, yimden yimsürtem den dang masü saka district administration

den tesendaktep tajung ayutsü ajungshia liasü. Changi-sa, sorkar mapa tatakzük ka dang lir ta shia tangar dak memetaloki alitsü atema skill development program tem ajanga pei poksüing aazüktsü ajungshia liasü.

Iba tesem nung aliba nüburtem teka mapa nung kanga tajung ta shia pai, parnok dang pei sempet arantgetshia amshitsü ajungshia liasü.

Sentong nung EAC Nokhu, Menlom Phom-i o tatsüka jembiba mapang, iba anogomung ya benjung ka ama dang masü saka meranga inyakba benjungba ama agitsü ayongzük. Pai sentepa aliba lokti dang tajangshiba aika bener aliba nisungtem nungi angazüktsü aser melenshia aotsü ajungshi. Maneni pai alirongsentem kanga kümdanga amshitsü nüngdakba lemsatepba den district nung terenlok nüngdakba lemsatepa liasü.

Kasa mapang nung Khamniungan Students' Union tir Shangchiu-i, aluroba ya aluyimba dak dang sendaka mali saka tanga lenlatem nung renloka aoba daka sendaka lir ta ashiba den iba benjung ya Tsüingrem temaotsü atema Pa nem tenüngsang agütsüba benjung ka ama amungtsüla, ta ashi.

Manenui taoba mapang Nokhu Range Students' Union, tir Talamong-ia nüburtem dang nüburtem yongtsü nung yimjung aser telongjem ajanga Hok-Ah temaotsü agizüktsü mepeshia metetdaksü. Paisa, lokti tentet balala lenirtem dang tatishitsü taküm kaka litetba ajanga lanurtem ajungmesotsü mepeshi.

Sentong nung VCC, Langnok Pengchang-i lokti pela agizükba o jembiba aser Choklangan Public Organization (Folk Fusion)-i ken ka tena liasü.

Ex-Parliamentarians Association of Nagaland-i asükhu lemsatep

Dimapur, Aenjeti/January 18 (TYO): Ex-Parliamentarians Association of Nagaland (Ex-PAN)-i sangdong ka ajanga züingsem tejen aser taoba mapang minister, Mavil Khieya January 18 nü ajungbena Kohima nung asüba osang angashia aoksaba aser temulung koremba lemsatepogo.

Asür Mavil ya 7 aser 9buba Nagaland Legislative Assembly House nung 14th Southern Angami I assembly constituency nungi lenir liasü aser pa ya 2003 küm nungi Ex-

PAN züingsem ka lir. Tasünü tashi pa association indang inyakyim balala nung shilem agia aruogo aser iba mapang pai Ex-PAN nem teyari balala agütsüba den lokti ajangzüktsü atema shisatsü balala agütsüogo aser pa asüba ya Ex-PAN kibong asoshi takoksa tulu lir.

Nagaland Legislative Assembly nung züingsem ka ama pei nübur tenüng nung nokdakba mapang asür Mavil-i, Naga nunger aser talisa Angami nunger ajungkettsü atema anibelem mesasai

inyakogo.

Pa asüba ya Angami nunger asoshi dang masü saka Naga nunger ajak asoshi takosa tulu lir. Ex-PAN-i Mrs. Avono aser asür kinungertem den asükhu lemsatep. Mangyim jashi tia nung aliba mapang Tsüingremi parnok nem anisüngzük aser tashi agüjang ta aser asür tanüla teti tatem makadak anisüngzükdakjang ta sarasademja atar, ta Ex-PAN tir Joshua Sumi aser General Secretary Tarie Zeliang nati külem sangdong ka ajanga metetdaksü.

Lighthouse Schools project sensak-semtsü atema senden ayonger

Dimapur, Aenjeti/January 18 (TYO): NECTAR Project kübok Lighthouse Schools (LCS) atema District Committee senden ka January 12 nü 11:00 ako nungi tenzüka Dimapur Deputy Commissioner Office, Conference Hall nung amentsü.

Officer DDMA, Land Records and Survey Officer, Project Director DRDA, Executive Engineer PWD (R&B), Executive Engineer PWD Housing, Executive Engineer PHED, Executive Engineer Department of Power, Divisional Forest Officer, Chief Medical Officer, District Welfare Officer, District Public Relations Officer, Heads of KGBV, Nkvayo, Sainik Schools, Naga Council Dimapur, Naga Commissioner of Police, Women HohoDimapur, aser Dimapur Naga Students' Union (DNSU).

Juro Coffee House nung 'live roaster roastery unit' ka lapokogo



Juro Coffee House, Chumoukedima nung Live Coffee Roastery lapoktsüba mapang PHED and Cooperation Minister, N. Jacob Zhimomi-i o jembiba noksa nung angur.

Dimapur, Aenjeti/January 18 (TYO): Juro Coffee House nung 'live roaster roastery unit' tasen ka lapoka company atsülanga aoba nung alizüing tasen ka tongtetogo. Iba jenjang agiba ajanga coffee innovation atema hub ka agütsütsü aser shishilembadak terenlok asoshi Juro bendanga agüja aliba sayur.

Proprietor Searon Yanthan-i, Juro kodaser tenzük iba indang lemsatepba den Nagaland kübok alu balala nungi coffee bean tajungtibatem bendener roast süa brew asütsü compang nükjidong aliba nenshia metetdaksü.

Public Health Engineering Department and Cooperation, Nagaland Minister N. Jacob Zhimomi-i, Juro Coffee House, CT Square 7th Mile Chumoukedima nung January 17 nü Live Coffee Roastery lapokja liasü.

Yanthan-isa, Nagaland coffee indang flavour tangar dang nungi balaka asüba Juro-i sayutetba aser kasa mapang nung iba ajanga aluyimba terenlok asoshi teyari agütsüba atema pela bilemba lemsatepa liasü.

Nagaland nung entrepreneurs tasentem nongita yaritsü koda tongtibang iba indang jembiba mapang Jakob-i, rongsenketzüing nung terenlok asoshi entrepreneurship nung lenmang sadema lapoka lir ta ashiba den Naga nunger entrepreneurs temi awawa inyakba ngua kanga ajungmesor, ta ashi.

Sentong nungsa Kiconic Tech Pvt. Ltd. and KLEY Enterprise (Westside Nagaland) ngutetsang Yanpuvo Kikon-ia o tatsüka jembiba liasü. Kikon-i, Juro kanga kara renloka aoba atema tenüngsang agütsü aser ashiba agi, parnoki primary, secondary, aser tertiary sector tem kanga takok ngua longjemdaksüogo aser company ya Nagaland nung coffee industry nung tongtibang shilem agir ka kümogo.

Paisa, mera talila agia Nagaland coffee ya alima nem metetdaksüba atema Juro Coffee House and Roastery Proprietor Searon Yanthan nem tenüngsang agüja liasü. Coffee supply chain tajung ka ajanga company-i Naga nunger lanurtem nem mapa agütsüba den local coffee ayimertem nem tajangzük agütsüdar, ta Jacob-isa shisem.

Sentong ya Lithamro Pvt. Ltd Director Kilum Yanthan-i tepela o jembir tembanga liasü, shibai tejaoker aser teyarir ajak dang kanga pelaba lemsatep. Roastery Floor tasen ka amenokba sülen Juro inyakyim tali atsülanga aotsü aser iba ajanga Nagaland ya map nung coffee destination tongtibang ka kümdaksütsü Juro nükjidong aliba nung tongtibang jenjang ka asütsü.



Pongro, Kiphire nung January 17 nü Tsungkanyo cum mini Hornbill festival shibangba sentong nung Advisor, Youth Resource aser Sports, S. Keoshu Yimkhiung-i o jembiba noksa nung angur.

RG Kar Hospital nung doctor tepsetba ken o nung Sanjay Roy aitsüogo



Kolkata, January 18, 2025: Yaküm Kolkata nung aliba R G Kar Medical College & Hospital nung doctor ka tashiyim amshia raksatsür tepsetba ken o nung tai tonglokja alir, Sanjay Roy police gari ka nung court-i anir aodang tangokba noksa nung angur.

New Delhi, Aenjeti/January 18 (Agencies): Yaküm Kolkata nung aliba R G Kar Medical College & hospital nung junior doctor ka tashiyim amshia raksatsür tepsetba ken o nung Honibarnü Kolkata nung aliba court kati obendang agüka Sanjay Roy aitsüogo.

Iba ken o nung court-i Hombarnü pa nem temerenshi obendang agütsütsü.

Anogo 57 tashi in-camera trail ajanga ken o angadanga aruba sülen Honibarnü Additional District & Sessions Judge, Anirban Das-i obendang

agütsü.

"Tai tonglokja alisang ken o Hombarnü angadangsü. Tang pa judicial ket nung agütsüogo. Hombarnü pa nem temerenshi obendang agütsütsü. Hombarnü nung 12:30 ako nung ken o angadangsü," ta Judge Das-i metetdaksü.

Court-i obendang agütsütsü sülen Sanjay-i, "Kü nem tiyazü nung tai tongloktsüogo. Ni iba aibelen meinyak. Aibelenertem chiokogo. IPS ka densema lir," ta ashi.

"Ni teti tekong nung 'rudraksh' ka azüker. Ni iba aibelen inyak asübo aibelenba tesem nungji chain tokdang lila. Ni iba aibelen meinyak," ta Roy-i ashi.

Ajisüaka Justice Das-i, "Hombarnü nü ken o angadangsü. Tang ni na judicial ket nung agütsür. Hombarnü nü nem temerenshi obendang agütsütsü," ta metetdaksü.

Yaküm August 9 nü hospital indang seminar takdang nung junior doctor tasügangji anguba sülen linük tesem ajaklen longkak aita liasü.

Iba tatalokba sülen hospital nung civic volunteer, Sanjay Roy pua liasü.

Ayushman Bharat ajanga ano teintet senso crore 6 ayimjemer

New Delhi, January 18 (Agencies): 'Ayushman Bharat' scheme ajanga ano arrshi küm 70 ser temapur teintet senso crore 6 ayimjemogo; ibaji densemabo Centre sorkar scheme ya ajanga linük nung nütsüng shilem 45 ayimjemer, ta Honibarnü Union Health Minister JP Nadda-i metetdaksü.

Summit 2025' nung jembidang Nadda-i, iba scheme ajanga senso crore 4.2-i tajangzük nguogo, ta ashi.

"Item nübur ya sensakertem lir- rickshaw amshirtem, bus conductors, oset belenshirtem, security sepaitem, kou mejepertem aser tsüngsem artem lir. Parnok health kari anepalutsütsü, ta shibaibo bilema liasü," ta Nadda-i ashi.

India-i tuberculosis (TB) anema raraba tsütsü takok ngudar, 2015 küm nütsüng lakh 1 shia nung shiranger 237 aliba nung 2023 küm tashi nungbo nisung lakh 1 shia nung 195 dang liasü, ta pai ashi.

Ato kilonser Narendra Modi-i 2025 küm tashi nungbo TB tashidak samatsütsü alizüng yua lir, aser ibaji ataloktsü atema AI aser X-ray devices amshir, ta pai ashi.

Paisa, 2017 Health Policy ya lenla ajak nung rangloker renema liasü, ta ashi.

'Mother and Child Tracking System' (MCTS) ajanga mashisa tetsürtem aser tanurtem asadanga anepalur; tang tashi nung tanur crore 5 aser tetsütem crore 3 dak tali vaccination aser tanga program kübok 'track' süogo, ta pai ashi.

Health Minister-i, 1998 küm tashi nung India nung AIIMS (All India Institute of Medical Sciences) ka dang liasü saka Modi sorkar kübok tangbo AIIMS 22 kümogo, ta ashi.

Medical education dak sendakba nung pai, 2015 küm linük nung medical college 381 liasü saka tangbo medical college 776 kümogo, ta ashi.

Paisa, healthcare jenjang tajungba akümsü atema medical seats (UG and PG) lakh 1.25 bendenlokogo, ta metetdaksü.

India nung medical device market ji tang dollar sen billion 14 shi jenjang lir saka 2030 küm tashi nungbo billion 30 akümsü imlar, ta paisa shisem.

PM Modi-i SVAMITVA Scheme kübok property card lemstsüogo

New Delhi, January 18 (Agencies): Honibarnü Ato kilonser Narendra Modi-i yimtsüng 50,000 dak tali nung SVAMITVA Scheme kübok property card lakh 65 lemstsüogo.

State 10 aser Union Territory 2 nung district 230 kübok yim 50,000 nung ali aser kiojen kiburtem nem property card lakh 65 dak tali lemstsü.

Ahmedabad nung Ato kilonseri video conferencing ajanga tajangzük angurtem den jembia liasü. Iba sentong nungji BJP National Tir aser Union minister JP Nadda-a liasü.

Iba scheme ya 2020 küm April 24 nü (National Panchayati Raj Day) Ato kilonser Modi-i tenzükja liasü. Yimtsüngtem nung drone aser GIS technology amshia kiojen kiburtem nem "Record of Rights" agütsütsü nükjidong nung iba scheme tenzük.

Honibarnü iba sentong nung jembidang Ato kilonseri, "Iba anogo ya linük nung aliba yimtsüngtem aser yimtsüngtem rongsenkettzüng atema puti otsü asütsüsa anogo ka lir. Tanü property card lakh 65 lemstsüba sülen tango yimtsüngtem nung nisung crore 2.24 ket nung Svamitva property cards lir," ta ashi.

Iba scheme dak sendakba

nung Modi-i, "Onoki terenlok aginer aser ajak nem temelung lemsteddaksüner, ibayongji onoki SVAMITVA scheme tenzük. Drones teyari agia yim ajak nung ali-kimong asadangtetsü ta onoki rateta liasü. Yimdaklirtemi parnok meyong kiojen indang documents angutsü," ta metetdaksü.

"Tanübo asenoki iba scheme ajanga anguba tajangzük balala asenoki meteter. Iba scheme ajanga onoki yimdaklirtem aser sensakertem tenzükteter, ta meteta onok melung asür. Tajangzük angurtem tejak nung tepela aser melung asüba angudang onok pelar. Iba ya temoatsü tuluka ama ni züngshir," ta paisa metetdaksü.

SVAMITVA (Survey of Villages and Mapping with Improved Technology in Village Areas) scheme kübok sorkari ali kiburtem nem kiojen indang documents shidak agütsütsü, aser ibaji ajanga kiojen tsütsü mangatetep adokba kanga ajema akümsü.

Iba scheme ya Puducherry, Andaman & Nicobar Islands, Tripura, Goa, Uttarakhand aser Haryana nungbo renema inyaktetogo. Madhya Pradesh, Uttar Pradesh aser Chhattisgarh state tem nunga drone survey bo temogo.



January 18, 2025 nü New Delhi nung General Anil Chauhan-i 'Drills, Thrills, and Spills: An Army Wife's Tales' kaket sayatsüdang tangokba noksa nung angur. Kasa noksa nung kaketzülur, Jyoti Barmola Mamgain-a angur.

Election atema AAP manifesto saya

New Delhi, January 18 (Agencies): Delhi nung assembly election agitsü hopta ishika dang lia Honibarnü AAP-i election manifesto sayaogo.

Osangbenertem senden nung jembidang AAP tongti lenir, Arvind Kejriwal-i, "Ni kolenisa odir para kidang alirtemi Delhi nung sorkar school tajung aser hospital tajung aliba ajanga parnok tajangzük kanga angur, saka angati electricity aser tzü schemes mangur ta ashir," ta metetdaksü.

Paisa, "Election sülen para kidang alirtem, talisa Purvanchal region nung alirtemia angati electricity aser tzü angutsü," ta ashi.

Kejriwal-i, election sülen Delhi sorkari Mukhya Mantri

Mahila Samman scheme mapa küma benoktsü aser ita shia tetsür nem sen 1,000 agüja aliba nung 2,100 agütsütsü, ta ashi.

"Iba scheme ya tetsürtem nem tashi agütsütsü aser parnok nüngdak peritsütsü atema lir. BJP-i bo iba ya angati 'revdis' ta ajar saka nibo iba ya asen loktiliba tashi itshidaktsütsü atema lir ta bilemer," ta pai ashi.

Ambedkar scholarship scheme dak sendakba nung Kejriwal-i, "Iba scheme kübok Delhi nung Dalit kaketshir ajaki foreign universities nung angati shisaliok angutsü. Parnoki item ama university nung admission agira Delhi sorkari parnok shisaliok, oli-oraba aser anenzükba nung indokba sen ajak agütsütsü," ta metetdaksü.



January 18, 2025 nü New Delhi nung sepaitemi Republic Day parade atema renemshidang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, JANUARY (AENJETI) 19, 2025

Temulung Kuremba

Asenok aika taküm nung tangari jashidaktsüba agi tako chitetbaji amadoktsü kanga tasak aser ibaji bilemtet shia asenok jashir aser mangyangner. Ibaji amadoktsü merangaka ma ta asen mulungjangi arupet arur aser iba jagi asen pelanüaka mepelatetter ta asenok aika mulungjang kurema alitsüa akok. Ibayongji lbri 12 :15 nung ashir, " tako süngra kar meiteta adoker iba jagi timtem agüjalir, nenok shinga Tsüngrem taochi magizüki malitsüsa kümdangang." Tetezü asenok taküm nung Tsüngrem taochi agizüka alinung dang asenoki tangar dang taidoktettsü aser asen anema tamajung inyakba ajak amadoktsü. Taküm nung asenok mulung kuremtsüsabaji maparen tapu balala nung ataloker. Karbo tanur asüdang kari mezügmeshia amshiba agi temulung kanga mejungi yirur alitsü akok. Karbo kidang apuani, adianu aser medemertemi jashidakja alitsüa akok. Ano karbo mapa inyakdak külem medemertemi temulung yirudakja alitsüa akok. Ashiko, item tekuremji nü mulungjang nung bener pelanüka mepelatet alitsüa akok. Aji oda, anogo shia item tejashi jagi asen mulung menentsüba asen mapa nunga tamakok ngua alitsüa akok, kechiyong jashia aliba mulungjang nung tajung inyaktsü mebilemer, anungji azükaru masür. Ajisüaka, asenoki metettsüba kaji, ashiko akhidang nisung kari asen mulungjang yirutsüsa inyaker aser jembirtem tobo temulung meyiper mesüra tamajung inyakba ajak to amadoker pelashishia alitsüa akok. Mesüra, asenoki jashir dang ashi, parnoki asen mulung yirutsütsü aser jashidaktsütsü asoshi inyakbabo masütsüa akok. Aji oda, kodang asenoki akhidang tangari asen mulung yirutsüba aser mepeladoktsüba mapatem ajak asen mulung nung kuoka yudir, ibaji asen mulungjang nung süngra tamajung ka süoka ayu ama asütsü aser ibaji ano tanaben meitettsü aser asen dang masü saka tangar a yirutsütsü. Ibayongji Laishiba asenok kümdangshidaktsür. Kasa Laishiba lbri 12:14 nung ashir, nisung ajak den yimjung nung alitsü merangang aser temeshiba koba makaibo Kibubaji mengutettsü, iba temeshibaji arishia oang. Iba Laishiba nung ashiba tajungshi o ya Tsüngrem taochiji lir. Iba o ya asenoki angara, asenok temeshi akümstsü aser asenoki tangar dang taidoktettsü aser asen mulung yirutsütsüsa tangari jembia aser inyakaka asen meyirutsü. Ibaji tangar asen dak jungjunga repranger injang kaloktsüaka mekashiba amai lir. Item ajakji Tsüngrem taochi ajanga lir. Tangar asenok kanga jashitsüsa inyakba agi, asenoki parnok dang teti jashia bilemtsübaji tim dang amai asenoki bilemtsüa akok. Ajisüaka, Tsüngrem o agi ashir, asenok mulung kurema aliba jagi asenokang yirutsü. Tsüngremi aji meteta lir. Atangji, asenoki ken nung atenba ama, ali tembartemibo asenok jashidaktsütsüa akok, ajisüaka asenok jashibaji memetettsüsa mesüra asen mulungjang yirua alibaji manepsütettsüsa asen Tsüngremji asenok nungi pilar alir masü. Paji teti asenok den lir. Pai asen mulungjang yirur alibaji angur aser asen jashia alibaji Pai meima repranger. Ajisüaka, kenken asenoki asen jashiba aser timatembaji Tsüngremi mangur ama bilemtsüa akok. Idangji asenok tali tali jashir aser Tsüngrem taochi magizükteti pilaadoker. Tangar dang tai medokteti kurema aliba jagi asenok temenen lar kümdaktsür, iba jagi asenok teti jashia alir. Ajisüaka, asenoki Tsüngrem dang asen mulung yirua aliba anepsü atema taochi meshira, Pai iba taochi jagi tangar anema kurema aliba tejashi tia nungi asenok kümzüktsü. Tsüngrem taochi agidang asenok kümzük aser iba kasa taochi jagi asenok mulung pelaa alitsüa Pai asenok mulung yirua aliba anepsütsü.

OLEMSABANG

ANAREP IMPUR

~ Molungkimong Literature Board

Molungkimong nung Arogo koda tenzük, asen Aor kijai dang masü Naga nunger ajaki satokjema meteta kar. Rev. Dr. E.W. Clark-i Molungkimong nunger nisung 15 December 22, 1872 nung baptitsü aser kibuba benjong kaa Aolima Naga tenem nung Arogoji tenzük aser aji Rev. Dr. E.W. Clark pa teka agi zülua lir. Iba nung ajemdaker ABAM tajemdak dak anogoji asütsü ta Ao Mongdangi ajang-ajanga renema tokogo aser iba nungji tashishitep kecha maka iba nung ABAM amendaka lir.

(P. Renthly Jamir, nai Rev. Dr. E.W. Clark Molungyimsen aser Impur, yim ana nungji Impur ta zülu aser P.F. Adams SDO Civil Mokokchung pai ibai züludang yim aika nungi Yimtsü-yimbo tem jatena akok tashi teimbai hao ta agizüktetba züluogo. Ano Rev. Dr. E.W. Clark Molungyimchen (Deka Haimong) yimdaki 1876 March ita nung atu. Iba küm nungjisa Rev. Dr. E.W. Clark-i October ita nung kibong 15 anir Molungyimsen akum ta nai zülu.)

Rev. Dr. E.W. Clark ya Molungkimong-i December ita 1872 nung atu aser yangji Arogo mezüng tenzük, iba sülen 1876 March nung atubaji Rev. Dr. E.W. Clark talitsü renemer Molungkimongi atu ta rajemtsür. Yim tasen kuma mao tashibo Molungkimong ta dang liasü, anungji kechiba nü mulung ket agi yim tenüng zülusatsür? P. F. Adams aruba ya 01/09/1939 SDO Civil Mokokchung 38 buba liasü. Ao lima nung British yimsüsüba 1880 nung amenoka doker liasü. P. Renthly Jamiri P. F. Adams züluba bener arubaji Molungyimsen yimji Rev. Dr. E.W. Clark pai anir aküm ta shinüba agi züluogo. 1876 October 24 anogo Molungyimsen akumba mapang Rev. Dr. E.W. Clark pa teka agi zülubaji "I went with them" ta ang zülua lir. Kodang iba orenji asen Ao o nung meyipzükdir "Ni Parnok den Ao/Ni parnok rong nung densema ao" ta angateter. Rev. Dr. E.W. Clark-i anir mao ta angateti. P. Renthly Jamir-i jembia Molungyimsen bhu akumer ta alimai kang junga angatetogo. Menja aponger atsükshishir ama kechi atema kanga pelepshia zülusar? Onoki angatetbabo na ya anü taoi tsük podak amai-ato. ABAM Arogo otsü research tempangogo, aji metetang!

Molungkimong yimsüsürtemi yim akümstsü temelaba agütsüba maongka indang nai züluogo, Molungkimong Putu yimsüsürtemi Molungyimsen akümstsü temelaba kecha magütsü, ibai Molungkimong nunger jurila otsü, na yangi temeyong joktsü makok, memetetra asüngdang jembia züluang, aji ta mesüra tashishiba alitsü.

Nisung sangrusangchi agi ozü jurila otsü raksatsütsü makok. Aortemi yim tasen leppoka akumba mapang Medemsanger Putu tenüng agütsür yim akumer. Molungyimsen akumba bo Reongsanger Putu tenüng agütsür akum, yangji ken o aika lir, itemji ozüi dang metet.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Donald Trump tenangzükba agidang Laishiba booklet 50,000 lemtsütsü



Washington D.C, January 17, 2025: Donald Trump-i US Tir tenangzükba agitsü anogo asem dang lia January 17, 2025 nü U.S. Capitol nung security checkpoints anasa nisung kar aliba noksa nung angur.

January 18, 2025: Hombarnü (January 20) Donald Trump US Tir tenangzükba agiba sentong nung Florida nung aliba Khristan ministry kati Laishiba booklets 50,000 dak tali lemtsütsü.

Hokolbarnü evangelistic organization Faith & Liberty-i sangdong ka ajanga, US Tir tenangzükba agiba sentong nung adenertem nem volunteer temi Laishiba booklets 50,000 lema agütsütsü, ta metetdaksü.

Seedline International aser HOPE to the Hill na teyaritep ajanga iba ministry inyaksü, ta Faith & Liberty teloki metetdaksü.

Hombarnü Trump-i US nung Tir 47buba inyaksü atema tenangzükba agitsü, aser iba sentong nungji adentsü arurtem nem Laishiba booklets agütsütsü. Laishiba booklets nungji Yohan aser Rome kaket

na densema lir. Faith & Liberty Senior Vice President, Peggy Nienaber-i, "America nung telemsa adokba aliba mapang ka nung Tir tasenba kubok administration-i teimla agütsütsüa akok. Iba ama tongtibang sentong ka atema onoki Laishiba booklets ya adok. Yisu Khrista ajanga nüburtem nem teimla agütsütsütsü atema iba kaket tila ya adok," ta metetdaksü.

Iba sentong takok angutsü atema yaritepba atema Nienaber-i Faith & Liberty ministry nung partners-Seedline International aser HOPE to the Hill na dang pelaba lemsatep.

Faith & Liberty teloki America nung tongti ketdangsertem den Khrista osangtjung lemsateptsü atema nükjidong yur inyaker. Iba nükjidong ataloktsü atema

parnoki sorkar ketdangsertem den tesendaktep yanglutsü meranger, Laishiba lemtsür, o entepba sentongtem ayongzükba agir, Bible studies aser osangbenertem senden ayongzükba, seminar agir aser sarasadem o tekülem sentongtem ayongzükba agir.

Seedline International ya Laishiba menünga alima tesem ajaklen missionary tem aser mission Arogotem nem lema agütsüba ministry ka lir.

HOPE to the Hill-i sarasadem sentongtem ayongzükba aser United States Congress aser staff tem atema Khristan kenten sentongtem ayongzükba katsür.

2017 küm nunga Khristan organization asem yagi senteper Trump mezüng Tir tenangzükba agiba sentong nung Laishiba booklets 51,000 lemja liasü.

Anti-conversion ozüng ano tesashiba benoktsü

January 17, 2025: India kubok Chhattisgarh state nung anti conversion ozüng tang aliba dang nungi ano tesashiba benoktsü, ta International Christian Concern (ICC)-i metetdaksü.

Chhattisgarh nunga Uttar Pradesh nung benoka aliba ama anti-conversion ozüng tesashiba benoktsü tebilemba lir.

Chhattisgarh nung benoktsü tebilemba aliba ozüng kubok kangshia tamangba yimsü meyipdaksürtem nem ano temerenshi tuluba agütsütsü.

Nisung kari danga mesüzüka mesüra kangshia tamangba yimsü meyipdaksüra ozüng kubok temerenshi tulu agütsütsü.

Chhattisgarh nung tribal nütsüng aliba tesemtem, talisa Bastar, Jashpur aser Raigarh

province tem nung lisopurtem aika Khristan yimsü dangi meyipdaksür, ta tai tonglokja lir.

2023 küm Bastar region kubok Narayanpur nung akhi sobaliba yimsü amangertem aika Khristan yimsü dangi meyipdaksüogo, ta tai tonglokja lisopurtem aser Khristan yimsü dangi meyiper lisopurtem tsüngda rara adoka liasü.

Iba kuli nungji ajemdaker 2024 küm tetenzüklen nungi Chhattisgarh state sorkari yimsü meyipdaksüba nokdangtsü atema ozüng tesashiba benoktsü asoshi inyaker. Tang tesüsa iba ozüng ya atangji benoktsü.

Chhattisgarh nung ozüng tasenba yanglurtemi anti conversion ozüng aliba state ter nung ozüngtem-a asadanga liasü. Item state rongnung

Uttar Pradesh nung ozüng tesashiba benoka lir. Ajioda Uttar Pradesh nung aliba Freedom of Religion Act amaji Chhattisgarh nunga benoktsü.

Tang Chhattisgarh nung BJP sorkar lir. Tawa BJP lenir, Prabal Pratap Singh Judeo-i, state nung yimsü meyipdaksüba kanga bulua ataloker, ta shiogo.

Judeo-isa, Khristan yimsü mesüra tanga yimsü dangi meyipertem nem Scheduled Tribes nem agütsüba reservation magütsütsüla, ta ashi.

1968 küm nungi Chhattisgarh nung anti-conversion ozüng lir aser BJP sorkari iba ozüng aiben yanglushitsü merangogo aser tang tesüsa kobi melii ozüng tesashiba agizütsüa akok, ta ICC-isa metetdaksü.

ANO GO ABEN TSÜNGREM DEN

TANELA TEZÜNGZÜKTEP AYUBA

"Tang Kibuba Israel Tsüngrem den, oda pa tetsübuttsü ain adokba asenok nungi oadoktsü asoshi tezüngzüktepba ka yanglutsü kü mulungjang nung lir." 2 Putipuyang 29:10

Tezüngzüktep ta kodang südir, kechi südir süaka, ochi shia inyaksü ta ayuba koba nisung ana mesüra telok ana tsüngt? agiteper. Yamaji tanu asenoki tezüngzüktep ya Tsüngrem den, nisung-o nisung na tsüngta yanglua ayur, koba ajanga tesemba, tetsükchitep melidaksür saka yimjung, temeim aser temoatsü lemsateper.

Temenen nisung ka temulung meyipa arudang Yisu Khristaji kü kümtetdakba ta agizüka taküm peyong Tsüngrem den aser alima madang tatishitsü tajung abenba tamanger ka küma alitsü tezüngzüktep yanglua ayur. Iba tezüngzüktepbaji tanaben atsüngzükba maotsü saka akang akanga nokdaka alitsü tenangzükba lir. Asenoki kechi tezüngzüktepa agir ibaji Tsüngrem tsüngdang ochi shia benshitsü?, memeshiba ajak nungi pilatsü, tsüngchir süa alitsü nangzükba lir. Hezekiah chubai ashi, "Iba tezüngzüktep raksaba ajanga tetsübuttsü, taoksatsü aser temokongtsü ka akümtsü anungji tetushiba nung ayutsüla."

Temeim adianutem, Nisung ka takümji tetsübuttsü, taoksatsü aser temokongtsü ka kümadokra kechi nung tagidak akatsü. Aseni Tsüngrem den asen tezüngzüktepba raksara iba tia jagi aitsü ana nung dang lir. Asenoki asen tamang jenjang ken meyipa reprangshidi aser asen tezüngzüktepba akangshidi.

Tang linük 173 nung oshi 3,526 nung Laishiba temeyipzükdak lir

January 18, 2025: Wycliffe Global Alliance-i '2024 Global Scripture Access Report' sangdongogo; iba report ya Wycliffe Global Alliance-i SIL International aser United Bible Societies densema partners aika teyaritep nung renema liasü.

Tang alima nung nütsüng billion 8 dak tema nungi nütsüng billion 7.45-i oshi 7,396 shi jembir aser Language Groups 756 ket nungbo Laishiba rangben (Tejen aser Tasen Lai naprong) lir, ta WGA report nung shia lir.

Language Groups 756 ji nütsüng billion 6 shi lir. 2023 küm sülen-a oshi 20 nung

Laishiba rangben meyipzükba adokogo.

Language Groups 1,726 (nisung million 835) ket nung Tasen Lai lir aser ibaji tesüiba küm ka tsüngda oshi tali 68 nung Tasen Lai meyipzükba adokba lir, ta report nung shia lir.

Ano Language groups 1,274 (nisung million 468) ket nung Laishiba shilem karbosa lir; 2023 küm den medemdangra ibajia renlokogo.

Tang alima nung linük 173 nung oshi 3,526 nung Laishiba temeyipzükdak lir. Wycliffe International Alliance agencies-i

linük 146 nung oshi 3,146 nung Lai meyizükba nung shilem agidar.

LA nung Korean Arogoi mi lendong nung takoksa angurtem yarir

January 17, 2025: Tang Los Angeles (LA) tesem aika nung merok mi ajanga kiojen aika rongdokba mapang nung Korean Arogotemi mi lendong ajanga takoksa angurtem yaridar.

Los Angeles nung alir 150,000 dak tali aienshidaksüogo aser firefighters 1,400 dak temai mi enseptsü merangdar.

Southern California nung aliba Korean Arogotem nung lenir kati, Arogoi masks aser blankets densema nungdakba oset balala lema agütsüdar, ta metetdaksü.

Altadena nung aliba Light of Love Mission Church nung pastor, Yoon Daehyuk-i, par Arogo nung züngsem ana meyong kiojen rongdokogo, ta metetdaksü.

"Tesem toktsür aienshitsü tetuyuba agütsüba ajanga ozü Arogo nung züngsemtema aikati pei ki toktsür hotels aser medemertem kidang jenokogo," ta pai metetdaksü.

Pastor-isa, "Mi tekeraba nung azüoktettsü aser kecha takoksa mengui pei kidangi tanaben meyipa arutettsü atema sarasademjang," ta mepishia metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG

Tebangnem

(adj) tebang nungi ola tadok ta ashiba (restrict not to speak up)

*Senden nung jembiba o meshishitsü atema mendeni tebangnem o metetdaksü.

Tebela

(n) tebok tiyong nung aroka ia aliba temang shilem (navel)

* Nisung karbo tebela kanga aroka ia alir.



Tir Yimyim

OLONG PAITEP # 7038

Grid for OLONG PAITEP # 7038 with numbers 1-17 in various cells.

TIPLÉN

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7038 TELANGZÜBA

TIPLÉN :

- 1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER MA



Alima nung Instagram reel teimtiba repringbaji India nunger arishi küm 21 tain Muhammad Rizwan indang reel lir. Rizwan ya Kerala, India nungi freestyle football player ka lir aser pa indang reel 554 million views nguogo. Iba ya Guinness World Records-ia ajitetogo aser Germany, Spain, o France nütsüng yongsük ajunga meyoktepaka pa indang views teimtiba lir. Muhammad Rizwan-i Instagram reel ka nung Keralamkundu Waterfall nung ball metsüba sayua lir. Iba reel ya November 2023 nung post asü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Shahnawas Khan tepsetba NIA nem bushisüngdang südaksünür



Imphal, January 18, 2025

(Agencies): Md Shahnawas Khan pur oa tepsetba atema tentetba Joint Action Committee (JAC)-i pa asüba kuli tejangja den iba ken o National Investigation Agency (NIA) nem bushisüngdang südaksütsü takhangba agütsüogo.

Tangatetep kati maru tashi JAC-isa Khan indang mang magizüksü lemtetogo. Sorkari ghonda 24 tsüngda Khan pur aoba aser tepsetba indang osang jangja ashitsüla ta parnokisa takhangba agütsü.

Md Shahnawas Khan ya Imphal East district nung par kidang nungi pur oa tepset aser

iba ya tashiyim agi sen meshiba atema inyakba liasü.

Sorkari Khan'er kibong nem nüngdakba teyari agütsütsü aser tarutsü nung ibala lendong mataloktsü atema maparen akangshitsü ta Manipur Chief Minister N Biren Singh-i metetdaksüogo.

Khan ya drugs shibelener ka ta tai tongloktsüba JAC convenor Ab Rahman-i anir züngsemtemi magizüker. Pa ya driver ka dang liasü ta parnoki ashir.

Hokolbar aonung JAC-i CM Biren Singh aser Meitei Pangal/ Pangal CSOs den ajurutepa iba ken o lemsatepogo.

Aranbam Tengol (AT) züngsemtem ta temulung melemi bilemertemi January 14, 2025 nü arishi küm 33 tain Khan pur ao ta police-i ashi.

Pa pur aoertemi Khan kinungtsü dang Rs 5 lakh meshi aser sen magütsüra tepsettsü ta amokmerena liasü ta police-isa metetdaksü.

Yamaji takhangba agüjaka Khan indang mang Thoubal District Hospital-i anir aru aser pa süadoker liasü. Iba dak sendakba nung temulung melemi bilemer nisung 6 puogo saka Aranbam Tengol-i iba tatalokba nung shilem kecha mali ta ashir.

Kokrajhar nung "No Road, No Vote" lungkak aiter

Guwahati, January 18, 2025

(Agencies): Assam kübok Kokrajhar district nung Chamarpara nung alirtemi "No Road, No Vote" yimyim agüja mapa tulu ka tenzükogo aser parnoki lenmang ka yanglutsü takhangba agütsür.

Parnoki Nayapara Nachanguri nungi Chamarpara tashi lenmang ka aginür aser iba ya küm aika parnoki meshia

aruba onük ka lir.

Chamarpara nung alirtemi Kokrajhar Deputy Commissioner ajanga Assam Chief Minister Himanta Biswa Sarma aser BTR Chairperson Pramod Boro na dangi shidi ka yokogo.

Parnoki ahangba ama meinyakra taruba elections mokdangtsü ta iba tesem nung alirtemi metetdaksüogo.

Gari lenmang tajung maliba ajanga iba tesem nung alirtemi timtem kanga ajurur aser talisa school tanurtem aser shirangertemi kangshir.

Iba tesem nung alirtemi BTR Chairperson Pramod Boro, MLA Lawrence Islary aser Assam sorkari dang iba lenmang asoshi temulung agütsütsü mepishia metetdaksüogo.

Tinsukia district nung 'rat-hole mines' 13 shibangtsüogo



Dibrugarh, January 18, 2025

(Agencies): Tinsukia district kübok Namdang colliery nung ketdangsürtemi ozüng alema nakmati atudak 13 shibangtsüogo aser excavators apu.

Iba ya nung Bittu Pahar nung lir aser tanep 8:30 ako meta nungi Margherita co-district Executive Magistrate Pritom Gogoi, Tinsukia Superintendent of Police (SP) Abhijit Gurav, aser North Eastern Coalfields o Assam Power Distribution Company Limited nungi teshimtet nübotemi mita ao.

Iba mapang police-i nakmati

atur asem apu aser ozüng alema nakmati atudaki electricity bener aoba power lines raksatsüba den electrical equipment apu.

"Ozüng alema nakmati atur nisung asem apu. Onokisa ozüng alema electrical connections raksatsü aser electrical equipment aika puogo. Onoki maneni ibala mapa inyaktsü" ta Executive Magistrate Pritom Gogoi-i ashi.

January 16 nü Morgaon nung Assam Cabinet senden amendang Assam nung North Eastern Coalfields nung ozüng alema nakmati atudak ajak shibangtsü lemtetba sülen tanep

iba mapa inyakogo.

Dima Hasao district kübok Umrangso nung ozüng alema nakmati atudak lendong ataloka nisung aika asüba sülen iba lemtet agiogo.

Tinsukia district kübok Margherita-Ledo tesem nung ozüng alema nakmati atuba asoshi tenük meyoker ta Ranjan Chowdhury-i metetdaksü.

"Ozüng alema nakmati atuba ya organized crime syndicate ka lir aser iba nung yimsüsürtemi yariteper. Nakmati abenba truck garitem aiben highway nung timtem melii senzür" ta Chowdhury-i YouTube video ka nung metetdaksüogo.

Gaza nung Deobar nungi ceasefire tenzüksü



Israel Ato Kilonser Benjamin Netanyahu-i Hokolbarnü Gaza ceasefire aser hostage deal atema vote agitsü atema pa indang security cabinet den ajurutebpa noksa nung angur.

Doha, Aenjeti/January 18

(Agencies): Gaza nung Israel aser Hamas na tsüingda ceasefire Deobar anepdang 8:30 ako nungi tenzüksü, ta Qatar indang Foreign Ministry otongdari X nung post ka ajanga metetdaksü.

"Telok balala tsüingda mulungtepba dak ajemdaker Gaza Strip nung ceasefire ya Deobar anepdang 8:30 ako nungi tenzüksü. Onoki adianutem dang kümdanga alitsü aser official source nungi tetuyab ata alitsü ajungshir," ta otongdar Majed al-Ansari-i Honibarnü tweet ka ajanga ashi.

Honibarnü ghonda trok dak tema senden amenba sülen Israel sorkari iba tenangzüktepba yangluba ya agizükogo, ta Israel Ato Kilonser Benjamin Netanyahu indang office sangdong ka ajanga metetdaksü.

Anogo 460 dak tema raratepba sülen iba tenangzüktepba yangluogo. Iba rara nung Israel nung sepaitemi Palestine nung 46,788 dak tema tepsetogo aser 110,453 yirutsüogo.

Tenangzüktepba kübok Hamas puri hopta trok tsüingda parnoki Gaza nung pua yua aliba Israel nung 33 chioktsü aser iba melena Israel-ia parnoki pua aliba Palestine nung noklang aika

chioktsü. Tebur sepaitem densema tanungba nisungtem ya tanabuba shilem nung chioktsü, koba mezüingbuba shilem benoka inyaksangshiba mapang sensak asemtsü.

Hamas puri ashiba agi, teti atema ceasefire benoka Israel nungi ajunga mainshira parnoki tanungba nisungtem ya mechiooktsü.

"Ceasfire benoktsü ghonda ishika dang anunga lia Gaza nung Israel military-kechi inyaksü ta ajaki bilemdar, kechiyong taoba mapanga ceasefire ka benoktsü lia Israel nung sepaitemi Gaza Strip tashi ajak agi maka aruogo," ta Al Jazeera osangbener Hamdah Salhut-i Jordan nungi ashi.

"Tetsübu aser mezüingjemtetba aika alitsü," ta Hamdah-isa shisem.

Lebanon nung amendaker aliba Hezbollah telok lenir Naim Qassem-i, tenangzüktepba ka yanglutetba atema Palestine nungertem nem tenüingsang agütsüogo aser ashiba agi, iba ajanga Israel nokdangtsü atema tanen makai inyakba sayur.

"Tenangzüktepba koba 2024 küm May ita benokba memelenshi aruogo, iba ajanga resistance teloki parnoki aginüba agitsü atema

tanen makai inyakba aser kasa mapang nung Israel-i taginüba magidaksüba kuli sayur," ta pai ashi.

November ita Hezbollah aser Israel na rara anentsü atema ceasefire benoka liasü. Gaza nung rara tenzükter aliba mapang kasa nung Israel nung sepaitem tesem külen Hezbollah dena rara liasü.

Kasa mapang nung Honibarnü tashi Israel nung sepaitemi Gaza nung tesem balala kanga mejungi makogo.

Gaza nung Medics temi ashiba agi, Israel-i Honibarnü Khan Younis anüolen anüing ajanga al-Mawasi "humanitarian zone" amakba sülen nisung pongu tepsetogo.

Palestinian Wafa news agency sangdong ka ajang ashiba agi, Qudra'er kibong nungi nisung ka den kinungtsü aser par jala jabaso asem tepsetogo.

Maneni Israel nung indang drone kati Hokolbar aonung menor Gaza City kübok Tuffah tesem amakba sülen Palestine nung asem tepseta liasü, ta Wafa-isa metetdaksü.

Bodhbarnü ceasefire benoktsü atema mulungtepba sangdongba sülen Israel nung sepaitemi Palestine nung 119 tepsetogo.

Ceasefire benoktsü atema tenangzüktepba ya Israel nung cabinet karibo magizüki liasü aser media osang balala ajanga ashiba agi, Netanyahu-i aniba teloktep sorkar nung minister 24-i ceasefire pusema vote agütsü aser minister ti-iba ya anema liasü. Israel indang security cabinet-i ceasefire atema tenangzüktepba pusema Hokolbarnü vote agütsür liasü.



UN Secretary-General Antonio Guterres-i January 18 nü Naqoura, Lebanon nung United Nations Interim Force in Lebanon (UNIFIL) headquarters nung peacekeeper tem asadanga noksa nung angur. UN Secretary-General Antonio Guterres-i Lebanon nung Israel military inyakyim anentsü ayongzükogo.

MULUNGNEN O

Menungrasete Bilemer

Ni rara tajungji raraogo Ni alizungji tonga asemogo. Ni tamangji yuogo. II Timoti 4:7



Aso 6-8-1954

Asü 8-1-2025

Onoki teti dang meima aliba obala asür **Mr. Jepdakyangba (Longpa)** Aoyimküm / Dimapur, pa shiranga aliba mapang nungi süra pa tasoli yim tonga temeibatam shirnokisa nübu, rongsen den tamang nüktzü agi ozü timtim nung yariba atema kinünger ajaki nenok dang pelar aser asen teyanglur Tsüngremi moajangma ta ozü tamang sarasadem.

Oba na taneptsü ngur arutsü onokibo yimlaseta ata saka nabo teti tatem makaba limai aotsüba onok den pela-a aoba asü ana? Joko koda asütsü teti tatem makaba tepela kodaker lima nungji ajuruteptsü onok tamang yudi nuo.

~ Temeim Kinungtsü, Chirnurtem aser Kinungertem.

OFFICE OF THE MERANGKONG SENSO TELONGJEM KOHIMA, NAGALAND

TENÜNGSANG AGÜTSÜR

Merangkong Senso Telongjem, Kohima ajanga Lt. OLEMTUBA JAMIR aser Wt. NAROTOSOLA na jabaso Wb. O. IMLIWATI, Department of Treasuries & Accounts, Government of Nagaland nung Director menden tongtetba asoshi tenüingsang aser tetushi agütsür.

Tsüngremi pa wadang nung maneni moajangma.

Sd/- Imlimatsung Tir MSTK **Sd/- Temjentoshi Tongti Zulur MSTK**

Iran SC obendanger ana tepset

Teran, Aenjeti/January 18

(Agencies): Iran Supreme Court indang obendanger tejen ana central Tehran kübok tribunal building amakba mapang kasetogo, ta judiciary aser state media-i metetdaksü.

Tena ya Honibarnü prangbong injang teperi bener aliba nisung kati tepset, shiba pasasa khaseta süogo, ta judiciary indang media centre-i metetdaksü.

Lendong nung asür ana ya Hojjat al-Islam Razini aser Hojjat al-Islam wal-Muslimeen Moqisseh ta jangjaogo aser tenaprongla ya court nung kongsang balala lenir lir.

"Tena ya national security, espionage aser kiralongrar anema raraba nung shilem agia liasü," ta kasa sangdong ajanga metetdaksü.

Judiciary otongdar Asghar Jahangir-i Iran indang state television dang ashiba agi, prangbong ka bener nisung ka obendanger ana aliba

takdang yagi ai aser tena dak injang khalokja liasü.

Obendanger anadak injang khaloktsüsang maitüsü mesüra pai kechiba obendanger ana ya tepset iba indang osang tejangja memetet.

"Bushisüngdangba sülen obendanger ana khasetsang ya taoba mapang Supreme Court nung ken o kecha nunga sendaka maliasü, mesüra pa tesemdangertem rongnunga densema mali," ta kasa sangdong ajanga metetdaksü.

State meyong Tehran Times-i ashiba agi, Honibarnü iba ki amakba mapang bodyguard-a ka yiruogo.

Iranian media-i ashiba agi, iba tatalokba nung densema alitsü ta temulung melemi bitemertem jangja-a aputsü atema bushisüngdangdar.

1998 küma Razini ya Tehran indang judiciary tekolak inyaka aliba mapang tepsettsü meranga liasü.

Elina, Monfils, Tien round of 16-i iogo



Elina Svitolina



Gael Monfils



Learner Tien

AUSTRALIAN OPEN

Aenjeti/January 18, 2025 (Agencies): Honibarnü Australian Open tetsür kija asaya nung Gael Monfils-i takok anguba sülen kinungtsü Elina Svitolina-ia tasembuba round nung world number four asayar tsükdaktsüogo.

Margaret Court Arena nung tebur kija asaya nung Monfils-i Taylor Fritz tsükdaktsüba sülen ghonda ishika dang lir Ukraine tsür Svitolina-i kasa tesem nung 2-6, 6-4, 6-0 agi Jasmine Paolini koka liasü.

Pei tata asaya akokba sülen kinungtsü o kinungbo naprongla taküm atema mezüngbuba Grand Slam nung round of 16 tongtetogo.

Svitolina round of 16 nung

unseeded Russia tsür Veronika Kudermetova den asayatsü, shibai Brazil tsür Beatriz Haddad Maia 6-4, 6-2 agi kokogo.

Kasa mapang nung asayar tejen Monfils-i Honibarnü tebur kija asaya tasembuba round nung Fritz 3-6, 7-5, 7-6 (7/1), 6-4 agi koka liasü. Pa tang agi 19benbuba Australia Open nung asayar.

Kasa asayamung tebur kija asaya nung qualifier Learner Tien-i France nunger asayar Corentin Moutet akokba sülen pa ya 2005 küm Rafael Nadal sülen Australian Open round pezübuba atongba asayar tanobusang kümogo.

America nunger arishi küm 19 tain asayar yagi iba asaya 7-6 (12/10), 6-3, 6-3 agi koka liasü. Asaya nung tia maka Moutet

tetsüng yiruba sülen kanga timtema asayaogo.

Iba asayamung tanabuba round nung Tien-i, taoba küm iba asayamung runner-up aser fifth seed Daniil Medvedev tsükdaktsüba sülen pai maneni kanga junga asaya tudar.

Tetsür kija asaya nung Emma Navarro aser Eva Lys nata round of 16-i iogo.

Honibarnü Emma Navarro-i 6-4, 3-6, 6-4 agi Ons Jabeur akokba sülen tang mezüngbuba Melbourne nung round of 16 tongtetogo.

Eva Lys, shiba jenjang 128buba nung lir lai tasembuba round nung Romania tsür Jaqueline Cristian 4-6, 6-3, 6-3 agi kokogo aser round of 16 nung la second seed asayar Iga Swiatek den asayatsü.

NSL January 28 nü tenzüktsü

Dimapur, Aenjeti/January 18 (TYO): Nagaland Super League (NSL) January 28 nungi March 31, 2025 tashi asayatsü ta asayamung ayongertemi metetdaktsüogo. Iba asayamung ya Nagaland nung football asayamung tulutiba asütsü, kong takok marok asoshi club tenet toktepba angutsü.

NSL ya, Nagaland Olympic Association den longjemer Nagaland Football Association-i ayongzük aser Nagaland sorkari senotsü teyari agütsüba den Department of Youth Resources & Sports-i nongita yaritsü. Iba asayamung ya All-India Football Federation (AIFF)-i agizüka licensed sütsüogo.

Football asaya meimertemi hopta shia Bodhbar aser Honibarnü football asaya reprangtsü asoshi maongka angutsü.

Asayamung nung asayatem ya Chümoukedima Football Stadium, Chümoukedima Police Complex aser Indira Gandhi Stadium, Kohima nung asayatsü. Asayamung atema

fixture ya yakta sangdongtsü, ta asayamung ayongertemisa metetdaktsü.

NSL atema ticket inyakyim ya tongmelang aser ajaki tozüktsü. Fan tem dang NSL indang official channel tem ajanga ticket officially sangdongba ata alitsü metetdaktsüogo.

Ticket tem ya AHIBI.in nungi alitettsü, kong parnoki option balala aliba nungi shimtettsü. Ticket dak sendakba nung item number tem + 9 1 8 8 3 7 4 0 2 4 7 2 +917005727288 nung t o n g t e p r a t e p t s ü metetdaktsüogo.

Taküm iba asayamung nung 27 United Football Club, Barak Football Club, Longterok Football Club, Nagaland United Sports Club (NUSC), Red Scars Football Club, Sechü Zubza Football Club (SZFC) aser Frontier Warriors Football Club nungeri shilem agitsü.

Maneni asaya mapanglem, ticket aser tanga osang balala agitsü atema fan tem dang social media nung NSL follow asütsü aser official website semdangtsü metetdaktsüogo.

ICC Champions Trophy atema India squad sangdongogo



Aenjeti/January 18, 2025 (Agencies): ICC Champions Trophy 2025 atema BCCI-i India team nungi asayar 15 tenüng sangdongogo.

Asayamung koba Pakistan aser Dubai nung asayatsü lir, iba asayamung nung India team Rohit Sharma lenisüba nung asayatsü.

Küm ti sülen Champions Trophy maneni asayatsü atema telemetba agiogo, koba hybrid model ka nung asayatsü aser India team asaya ajak Dubai nung asayatsü aser tanungba asayatem Pakistan kübok tesem asem nung asayatsü.

Asayamung nung India team mezüngbuba asaya February 20 nü Bangladesh den asayatsü aser iba sülen Pakistan aser New Zealand den asayatsü. India aser Pakistan na 2017

küm Oval nung iba asayamung final asayaogo, kong India team kanga mejungi tamakok ngua liasü.

India team-i MS Dhoni lenisüba nung 2013 küm iba asayamung kokogo. Kasa mapang nung 2002 küm final asaya tzünglu aruba ajanga masayatetba sülen India aser Sri Lanka na külem takoker ta sangdonga liasü.

India Champions Trophy 2025 squad:

Rohit Sharma (c), Shubman Gill (vice captain), Virat Kohli, Shreyas Iyer, KL Rahul, Hardik Pandya, Axar Patel, Washington Sundar, Kuldeep Yadav, Jasprit Bumrah, Mohammed Shami, Arshdeep Singh, Yashasvi Jaiswal, Rishabh Pant, Ravindra Jadeja.

Palace-i Esse den tenangzüktepba yangluogo



Aenjeti/January 18, 2025 (Agencies): Crystal Palace-i Millwall winger Romaine Esse den küm ponguser tesadang atema tenangzüktepba ka yangluogo.

Arishi küm 19 tain Lions academy nungi graduate

asisang shiba England tenüng nungi under-18, U19 aser U20 nung asayaogo, pa pound million 12 agi alizükogo aser tanga taa tem bendenlokerbo pound million 14.5 ajungtsü imlar, ta osang ajanga metetdaktsü.

Esse ya Millwall nungi mezüng 2022 küm January 26 nü arishi küm 17 asüba mapang asaya liasü. Pai iba club nungi 66 ben asayaogo aser iba mapang goal tenet idaktsür lir.

"Romain ya asaya reprangertem pei menden nungi nokdaker reprangdaktsüba asayar ka lir," ta Palace mendenbuba Steve Parish-ashi. January transfer window nung Palace puri tang mezüngbuba Romaine alizükogo.

"Pa asayaba moapu nung nüngtugu kuma pa dak sempet tajung aliba ama asayaba reprangtsü atema club dak sendaka alir ajak yongyaseta atadar," ta paisa shisem.

Lambeth nung asosang Esse-i tang asaya aliba season

nung Millwall atema goal pongu idaktsüogo. Pai tatemsa Championship nung Norwich goal 2-1 agi makokba asaya nung goal ka idakja liasü.

Millwall manager Alex Neil-i lanur asayar ya Hombarnü FA Cup nung goal 3-0 agi Dagenham & Redbridge akokba asaya nung masayadaktsü liasü, kechiyong Esse tarutsü mejangjai liasü.

Esse medical tetendangba tembangba sülen tenangzüktepba yangluba ya Palace-i Honibarnü sangdonga liasü.

"Ni idaki aruba atema kanga pelar. Iba ya project tajung ka aser maongka tajung ka lir, anungji ni asaya tenzüktsü matateter," ta Esse-ashi.

Oliver Glasner-i aniba Palace team ya Premier League nung tang 15buba nung lir. Parnoki tatemsabuba asaya nung Leicester City goal 2-0 agi akokba sülen parnok relegation zone nungi point ti agi pilaogo.

BILEMDANGANG

"Tia agi meranga inyakerem dang pusemer."